

## **SAMÞYKKT**

### **um meðhöndlun úrgangs í Blönduósbæ**

#### **I. Kaffi**

##### **Almenn ákvæði**

##### **1. gr.**

Blönduóssbær annast meðhöndlun úrgangs í sveitarfélaginu á þann hátt og með þeim takmörkunum sem leiða af samþykkt þessari, lögum um hollustuhætti og mengunarvarnir nr. 7/1998 og lögum um meðferð úrgangs, nr. 55/2003 og reglugerðum settum með stöð í þeim lögum. Bæjarstjórn og heilbrigðisnefnd Norðurlands vestra, í samræmi við lög nr. 7/1998 um hollustuhætti og mengunarvarnir og lög um meðferð úrgangs, nr. 55/2003, hefur eftirlit með meðhöndlun úrgangs og að farið sé að samþykkt þessari. Bæjarstjórn sér til þess, í samráði við heilbrigðiseftirlit og framkvæmdaaðila, að íbúar fái fræðslu um flokkun og aðra meðferð úrgangs, móttöku hans og förgun, t.d. með útgáfu leiðbeininga.

##### **2. gr.**

Blönduóssbær annast sorphreinsun frá öllu íbúðarhúsnæði í sveitarfélaginu. Bæjarstjórn og heilbrigðisnefnd Norðurlands vestra hefur eftirlit með starfsemi. Bæjarstjórn er heimilt að fela öðrum framkvæmd sorphreinsunar og móttöku annars úrgangs, þ.m.t. móttöku spilliefna, brotajárns og landbúnaðarplasts. Þeir aðilar sem þetta annast skulu hafa starfsleyfi heilbrigðisnefndar eða Umhverfisstofnunar eftir því sem við á. Sorpförgun skal framkvæmd undir yfirstjórn og á ábyrgð bæjarstjórnar. Bæjarstjórn er heimilt að fela öðrum að sjá um sorpförgun og samskipti við þá aðila sem við á.

##### **3. gr.**

Sérhverjum húseiganda og umráðamanni húsnæðis (húsráðanda) er skylt að nota þær aðferðir og þau ílát við geymslu og meðferð úrgangs sem bæjarstjórn, í samráði við heilbrigðisnefnd, ákveður hverju sinni í samræmi við lög og reglur þar að lútandi. Sorpgeymslur skulu vera aðgengilegar fyrir sorphirðumenn, standa við hús framanverð og sem næst aðkomu að lóð. Þær skulu staðsettar saman ef um fjölbýlishús er að ræða. Húsráðendur skulu halda ílátum hreinum og í góðu ástandi. Húsráðendur skulu hreinsa snjó frá sorpgeymslum og sorpílatum eins og þörf krefur til að halda ávallt greiðfærri leið að þeim.

##### **4. gr.**

Í sorpílát fyrir heimilisúrgang má aðeins setja þann úrgang sem fellur daglega til við venjulegt heimilishald, í samræmi við nánari fyrirmæli sem kunna að verða sett um flokkun úrgangs. Sorphreinsimönnum ber aðeins skylda til að losa viðurkennd sorpílát. Óheimilt er að láta garðaúrgang, jarðvegsefni, brotajárn og annan grófan úrgang í sorpílát og gáma. Jarðvegsefni, þ.m.t. grjót, múrbrot o.þ.h. skal setja á viðurkennda losunarstaði. Spilliefnum, lyfjum og öðrum hættulegum úrgangi skal skilað á viðurkennda móttökustaði. Glerbrotum og öðrum oddhvössum hlutum, sem hætta er á að skaði þá sem meðhöndla úrgang eða sorpílát, skal pakkað inn eða gengið frá þeim á annan tryggilegan hátt. Gæta skal þess að fylla ekki sorpílatin meira en svo að auðveldlega megi loka þeim. Húsráðanda er heimilt að skila umfram úrgangi á viðurkennda móttökustaði á vegum sveitarfélagsins.



### 5. gr.

Bæjarstjórn ákveður tíðni sorpsöfnunar í bænum sem skal þó eigi fara fram sjaldnar en á 14 daga fresti. Íbúum skal kynnt tíðni sorpsöfnunar með hæfilegum fyrirvara. Allan úrgang sem að mati húsráðenda þarf að losa örar en gert er ráð fyrir samkvæmt áætlun þar um, skal húsráðandi sjálfur og á eigin kostnað losa í flokkunarstöð eða í viðeigandi gáma á fyrirfram ákveðnum stöðum.

### 6. gr.

Fyrirtæki og stofnanir skulu sjálf sjá um hirðu framleiðsluúrgangs. Frágangur og umgengni um sorpílát, svo og flutningur á úrgangi frá fyrirtækjum skal vera í samræmi við fyrirmæli heilbrigðisnefndar. Staðsetning sorpgáma eða móttöku vegna framleiðsluúrgangs skal vera í samræmi við ákvarðanir tæknideildar þar um, eða ákvæði deiliskipulags.

## II. Kafi.

### Gjaldtaka vegna meðhöndlunar úrgangs

### 7. gr.

Bæjarstjórn skal innheimta gjald fyrir förgun úrgangs í samræmi við ákvæði 1. mgr. 11. gr. laga nr. 55/2003 um meðhöndlun úrgangs. Þá er bæjarstjórn heimilt að innheimta sorphirðugjald fyrir alla aðra meðhöndlun úrgangs og tengda starfsemi í samræmi við 2. mgr. 11. gr. laganna. Gjaldið skal sett og innheimt samkvæmt gjaldskrá sem sett er samkvæmt ákvæðum 11. gr. laga nr. 55/2003 um meðhöndlun úrgangs og 25. gr. laga nr. 7/1998 um hollustuhætti og mengunarvarnir, að fenginni umsögn heilbrigðisnefndar. Heimilt er að leggja gjöld þessi á hverja fasteign eða aðila sem nýtur þjónustunnar. Almennt sorphirðugjald skal taka mið af fjölda og stærð íláta, hreinsunartíðni og förgun. Heimilt er að haga gjaldskrárflokkum eftir þjónustustigi. Gjöld í hverjum flokki skulu vera sem næst meðal raunkostnaði við þá þjónustu sem veitt er, en þó aldrei vera hærri en sem nemur rökstuddum kostnaði við veitta þjónustu, umsýslu og eftirlit með einstökum þáttum. Gjöld skulu lögð á hverja fasteign, stofnun eða fyrirtæki sem nýtur framangreindrar þjónustu og innheimtast með sama hætti og fasteignagjöld. Til tryggingar greiðslu sorphirðu- og förgunargjalda samkvæmt gjaldskrá er lögveðréttur í viðkomandi fasteign í tvö ár frá gjalddaga. Bæjarstjórn skal láta birta gjaldskrána í B-deild Stjórnartíðinda.

### 8. gr.

Bæjarstjórn er heimilt að setja upp gjaldskrárflokka fyrir mismunandi þjónustu og kostnaði fyrir húsráðanda, með það að markmiði að draga úr magni og umfangi úrgangs sem fer til urðunar.

## III. Kafi.

### Ýmis ákvæði

### 9. gr.

Hafi húsráðandi kvörtun fram að færa vegna meðhöndlunar úrgangs, skal hann koma henni á framfæri við tæknideild Blönduósbæjar eða framkvæmdaaðila. Telji viðkomandi sig ekki fá fullnægjandi úrlausn, getur hann skotið málinu til Heilbrigðiseftirlits Norðurlands vestra.



**10. gr.**

Óheimilt er með öllu að fleygja rusli, garðaúrgangi eða öðrum úrgangi á opin svæði, þjóðvegi, götur, gangstíga, fjörur eða vatnsbakka. Óheimilt er að skilja númerslausa bifreiðar og aðrar vélar, báta eða tæki eftir á víðavangi. Starfsmönnum áhaldahúsa sveitarfélaga er heimilt, í umboði heilbrigðisnefndar, að fjarlægja hluti sem eru geymdir þannig að í bága fari við hollustuhátta- og mengunarvarnareglugerðir. Heimilt er að undangenginni viðvörun að fjarlægja slíka hluti. Viðvörun skal vera í formi límmiða, sem límdur er á tækið. Viðvörun skal auðkennd Heilbrigðiseftirliti Norðurlands vestra.

**11. gr.**

Með brot gegn samþykkt þessari fer samkvæmt ákvæðum laga nr. 7/1998 um hollustuhætti og mengunarvarnir og laga nr. 55/2003 um meðferð úrgangs.

**12. gr.**

Framangreind samþykkt Bæjarstjórnar Blönduóss staðfestist hér með samkvæmt ákvæðum 3. ml. 5. mgr. 4. gr. laga nr. 55/2003 um meðhöndlun úrgangs, sbr. ákvæði 25. gr. laga um hollustuhætti og mengunarvarnir nr. 7/1998, með síðari breytingum, til þess að öðlast þegar gildi.

*Umhverfissráðuneytinu, 22. febrúar 2007*

*F. h. r.*

*Sigurbjörg Sæmundsdóttir*

*Ingimar Sigurðsson*